

蓬

窗

日

錄

蓬窓目錄序

津南陳公叅晉藩之明年政既成乃  
出其所著蓬窓目錄者視諸太原吳  
侯侯請而刻諸祁乃問序于後菴朱  
氏朱氏讀之罔不章章稱快也曰錄  
也為世道計也其可傳也夫錄凡為  
目者四雖述作罔專細大不擇要其  
指于治理為詳茲不他論論治序曰

稽諸往謀君臣道合必敷奏以考功  
擬議以盡變計定而往善也百計而  
百全善之善也故立功立言哲人尚  
焉然士絀于時者每每十五此其故  
何哉嗟難言矣非獨世之過也亦夫  
人之不善用世焉爾是故負士名者  
亡治具亡功有具矣而弗遇亡功具  
而遇矣不善用與用而不終者亦竟

亡功嗚呼此古之治日所以常少也  
當今

聖神御宇久道蒸蒸海內稱極治矣百  
司受成安所裨益然少有計畫以聽  
采擇者不過曰國勢曰士風曰紀綱  
曰宗藩曰士馬曰食貨曰南之倭北  
之胡與時低昂大都止于此矣茲錄  
有不備乎又皆本天時括地勢推人

情物理以盡其變雖九州異宜諳若  
指掌蓋說治莫辯乎錄矣故曰錄也  
為世道計也即古人奚讓焉是故通  
達類賈傳知幾守正類陸敬輿雖辨  
別利病又巽言而有矜心即杜牧氏  
不逮也夫杜言誠中然激亢難投卒  
其說廢格矣洛陽竒才而不售或有  
不當帝心者乎未必絳灌諸言之易

也唯陸為王佐亡論今陳公負偉望  
且習熟當世之故若此行將服大政  
以奉

明主則振聲一代者豈後陸宣哉吾且  
撰王褒之頌矣然非謾也吾嘗反復  
錄中語唯陳公獨持存省正論又指  
評諸儒不爽至于論文雖獻吉諸人  
亦當首肯信匪通儒不能也余言豈

謾哉然陳公語又曰人臣當顧養忠厚保合太和乃其指益要眇矣仁愛恢恢殆長者以善養人術不在多也余竊心慕焉或問錄以詩終蓋溫柔敦厚二南所以獨盛也今顧求治于性情乃益信陳公長者必有深念也後菴氏曰余晚得耻菴先生遺事而知陳錄之所由來矣夫大河東下且

遍域中然履九派者慕崑崙珠淵玉璞有自哉是故君子論世也

嘉靖四十四年乙丑秋七月朔日

賜進士出身吏科給事中山西朱繪序



蓬窓日錄卷之一

寰宇一

九州

山脉

水源

北畿

南隸

淮南重鎮附

山東

山西

陝西

河南

浙江

江西

湖廣

四川

福建

廣東

廣西

雲南

貴州

諸夷



蓬窓日錄卷之一

周禮職方氏掌天下之圖以掌天下之地辨其邦國都鄙四夷八蠻七閩九貉五戎六狄之人民與其財用九穀六畜之數要周知其利害乃辨九州之國使同貫利

東南曰揚州其山鎮曰會稽

在今浙江會稽縣

其澤藪曰具區其

川三江其浸五湖其利金錫竹箭其民二男五女其畜宜鳥獸其穀宜稻

正南曰荊州其山鎮曰衡山

在今湖廣衡山縣

其澤藪曰雲夢其川

江漢其浸潁湛其利丹銀薩革其民一男二女其畜宜鳥獸其穀宜稻

河南曰豫州其山鎮曰華山

在今陝西華陰縣

其澤藪曰圃田其川

滎洛其浸波澍其利林潦絲枲其民二男三女其

畜宜六擾其穀宜五種

正東曰青州其山鎮曰沂山

在今山東臨朐縣

其澤藪曰望清其川

淮泗其浸沂沐其利蒲魚其民二男二女其畜宜

鷄狗其穀宜稻麥

河東曰兗州其山鎮曰岱山

即泰山在今泰安州

其澤藪曰大野其

川河涕其浸盧維其利蒲魚其民二男三女其畜

宜六擾其穀宜四種

正西曰雍州其山鎮曰嶽山

即吳嶽在今陝西隴川

其澤藪曰弦蒲

其川涇汭其浸渭洛其利玉石其民三男二女其

畜宜牛羊其穀宜黍稷

東北曰幽州其山鎮曰醫無閭

在今遼東廣寧衛

其澤藪曰獫

養其川河涕其浸菑時其利魚鹽其民一男三女其畜宜四擾其穀宜三種

河內曰冀州其山鎮曰霍山

在今山西霍州

其澤藪曰楊紆其

川漳其浸汾潞其利松柏其民五男三女其畜宜牛羊其穀宜黍稷

正北曰并州其山鎮曰恒山

在今大同府渾源州

其澤藪曰昭餘

祁其川庫池嘔夷其浸涑易其利布帛其民二男三女其畜宜五擾其穀宜五種言山鎮者是槩言九州之山鎮也不言徐州疑併入於青不言梁州

疑併入於雍豫也詩嵩高註以南嶽爲霍山職方

以爲衡山葉氏曰漢元封五年巡南郡禮天柱山

一統志衡山有天柱峯六安州有霍山一名衡山一名天柱卽漢武帝所封號曰南嶽

是以衡山神遠移於霍山也以爲一山兩名者失之王制有恒山衡山而不言太華嵩山以南北所至山而言舜典有四嶽而不言中嶽以巡守所至四方而言泰山爲東嶽華山爲西嶽恒山爲北嶽衡山爲南嶽嵩高爲中嶽蓋禹貢之方外也職方不言嵩高周在五嶽之外以雍之吳山爲嶽山皆有不同五代失河北之地至宋未能混一北爲契丹所有乃以真定府曲陽縣之恒山爲北嶽

國初定鼎金陵祀典肇以泰山爲東嶽沂山爲東鎮  
衡山爲南嶽會稽山爲南鎮華山爲西嶽吳山爲  
西鎮真定之恒山爲北嶽醫巫閭山爲北鎮嵩山  
爲中嶽霍州之霍山爲中鎮後遷

都北平則真定在其南故仍以山西大同渾源州之恒  
山爲北嶽其餘嶽鎮皆如舊云

堯別九州舜爲十二

秦前有藍田之鎮後有胡苑之塞左崤函右隴蜀西通  
流沙險阻之國也

蜀漢之土與秦同域南跨邛笮北阻褒斜西卽隈礙隔  
以劔閣窮險極峻獨守之國也

周在中樞西阻峭谷東望荆山南面少室北有大嶽三河之分雷風所起四險之國也

魏前枕黃河背障水瞻王屋望梁山有藍田之寶浮地之淵

趙東臨九州面瞻恒嶽有沃瀑之流飛狐井陘之險至於潁陽涿鹿之野

燕却背沙漠進臨易水西至君都東至於遼長蛇帶塞險陸相乘也

齊南有長城巨防陽關之險北有河濟足以爲固越海而東通于九夷西界岱嶽配林之險坂固之國也魯前有淮水後有岱嶽蒙羽之向洙泗之流大野廣土



曲阜尼丘

宋北有泗水南迄睢過有孟諸之澤碭山之塞也

楚後背方城前及衡嶽左則彭蠡右則九嶷有江漢之流實險阻之國也

南越之國與楚爲鄰五嶺以前至于南海負海之邦交趾之土謂之南裔吳左洞庭右彭蠡後濱長江南至豫章水界險阻之國也

東越通海處南北尾間之間三江流入南海通東沿嵩海深險絕之國也

衛南跨于河北得洪水南過漢上左通魯澤右指黎山

讚曰

地里廣大

四海八方

遐遠別域

略以難詳

侯王設險

守國保疆

遠遶川塞

近備城堙

司察軒非

禁禦不良

勿恃危阨

恣其淫荒

無隱則敗

有德則昌

安室猶懼

乃可不亡

進用忠良

社稷永康

教民以孝

舜化以彰

四瀆河出崑崙墟江出岷山濟出王屋淮出桐柏

八流亦出名山渭出鳥鼠漢出嶓冢洛出熊耳涇出少

室汝出燕泉泗出涪尾沔出月台沃出太山水有

五色有濁有清汝南有黃水華山有黑水汴水淵

或生明珠而岸不枯山澤通氣以興雷雲氣觸石  
膚寸而合不崇朝以雨

五嶽視三公四瀆視諸侯賞封內名山者通靈助化位  
相亞也故地動臣叛名山崩王道訖川竭神去國  
隨以亡海投九仞之魚流水涸國之大誠也澤浮  
舟川水溢臣盛君衰百川沸騰山冢萃崩高岸爲  
谷深谷爲陵小人握命君子陵遲白黑不別大亂  
之徵也

夷者觝也其類九畎夷千夷方夷黃夷白夷赤夷玄夷  
風夷蠻者慢也其類八天竺咳首僬僬跛踵穿育  
僂耳狗軌旁春戎者兇也其類六僂夷戎決老白

者羗鼻息天剛狄者辟也其類五月氏獫狁匈奴  
單于白屋

地脉向中國來者三支北絡發崑崙東折而東南行其  
背爲北狄其正結爲冀都其支結爲燕京其餘氣  
爲東夷冀都自雲中上黨博換來三面統河外案  
多疊大河東北徂入海重重包裹故堯舜禹都之  
但四旁險阻貢輸非後世所便河且徙而南氣太  
洩燕京氣非隴結下沙轉少又藩籬單薄時或山  
東泉涸漕水何賴而河徙而南同之中絡發崑崙  
東南至岷山由蜀隴轉北而東爲終南長安之地  
也金城四塞以爲固古豪傑有取焉貢輸艱入後

世費繁今能處之耶由關中出至太華中嵩伊關  
既鑿是爲洛陽洛陽天地之中陰陽和南北平百  
物會周公營之地氣自北而南人事化機互相爲  
用古今固不齊也行乃盡於東秦翻身顧祖東海  
外盪河江前向萃產賢貴疑聚有因後世河徙截  
其來脉者三會通河復加截之其力遂微南絡發  
崑崙迤東南而行至大峨山其背爲西戎直南折  
而東爲五嶺其餘氣爲南蠻復折而東北大盡於  
建康其支結爲吳閩越大峨而下至於五嶺環抱  
中原情無南面力雄勢坎吳閩越支疑謫力海水陽  
勝明有餘而氣不足以當之一大都會於今日其

金陵也乎長江天塹財用易輸持護不少世謂江  
左不得於宅中偏安不可以圖大是安於建康之  
說不能用建康於天下夫安於建康乃河大勢不  
拱東壩未立秦淮河不湧邦溝尚微故建康俗徂  
於自便知守江而不知用淮於江知圖淮而不知  
用天下於淮知據武昌之上游而不知上游之守  
鎮知集貨之易而不知散貨以用於四方知南兵  
之難振而不知練兵於北之可用故金陵不可以  
故常論當有知者曠百世相感不爾則中絡爲河  
截所在其汴淮江漢之間乎

太祖以金陵爲南京汴梁爲北京當動深長思矣

欲聯屬兩京以制天下宜於揚州臨清徐州置重臣鎮之其聯屬徐臨二而執其中則濟寧爲之要轄其聯屬揚徐而執其中則淮安爲之要轄臨爲梁冀青兗之會揚爲江淮汴海之交徐爲梁冀青兗江淮汴海之限

禹本紀并水經皆以崑崙爲地之中崑崙墟在西北去嵩高五萬里而以其爲中者東南皆水水土在天運問要不可定論也我

朝輿地之廣縱二萬九百里橫一萬一千七百五十里其東西南北水陸驛站里分至到數具載寰宇通志其延袤大略則如此矣四夷之驛不與焉於戲

盛哉

山脉

臨川吳氏曰天下山脈起於崑崙山脉之所起卽水源之所發也朱子曰河圖言崑崙地之中也又曰冀都山脉從雲中<sub>雙</sub>來蓋太行山一千里河東河北太原晉陽諸州北<sub>口</sub>左旋其趾山後卽忻代諸州上黨卽今潞州春秋<sub>爲</sub>赤狄潞氏其地極高與天爲黨故曰上黨過河便見山在半天如黑雲然故曰雲中自春以西之水則西流入於龍門西河以東之水則東流入於海前面一條黃河環繞平陽卽河中府蒲坂山<sub>之</sub>盡處堯舜之所都也泰山聳於



左爲龍右畔是華山聳立爲虎自華至中嵩

中嵩獨高當天之中又曰泰室在河南登封縣

爲前案淮南諸山是筭

重案江南諸山及五嶺

大庾始安臨賀桂陽陽

又爲第三

重案又曰前代多都關中以黃河左右旋統沂

止有函谷關一路可據爲險其山皆自蜀漢來

長安而盡又曰天下之山西北最高自關中一

生下函谷以至嵩少東盡泰山又自嶧冢漢水

北生下一支至揚州而盡又曰岷山之脉其一

爲衡山者已盡於九江之西其一支又南而東

桂嶺者則包湘

衡岳

源而北經袁

江西

潭之境

盡於廬阜

匡廬在南康

其一支又南而東度庾嶺

卽

江西大庚縣

者則包彭蠡之源以北盡於建康

今南京

一支則東包浙江之源而北其首以盡會稽南其

尾以盡乎閩粵

廣東

也又曰仙霞嶺在信州

今信州府

水之右其脊脉發去爲臨安

今杭州山從天目山發來

又發去

爲建康又曰江西山皆自五嶺贛上來自南而北

故皆逆閩中卻是自北而南故皆順又曰閩中之

山多自北來水皆東南流江浙之山多自南來水

皆北流故江浙冬寒而夏熱愚謂古今言方輿者

必本之山川蓋以山爲巨鎮水爲藪澤建邦樹都

恒守之以爲固先儒謂山爲水之網水爲山之紀

而洪河大山亦天地間大界限也然論險者每言

關中左殽函右隴蜀爲四塞之地東制諸侯如建  
瓴水而楚漢以後爭天下者常得斬關而入次言  
巴蜀劍門爲天下北而晉鄧艾之兵從陰平趣涪  
卒亡後主易曰天險不可升也地險山川丘陵也  
孟子曰域民不以封疆之界固國不以山谿之險  
傳曰天子有道守在四夷至今讀其言尤信

### 水源

素問曰天不足西北地不滿東南蓋地西北高東南下  
江海百川所聚海水周於地之四維其流東極氣  
盡故歸墟尾閭如沃焦釜北海路最遙至極盡處  
疑與天浮接也東夷女直爲黑水靺鞨之後國有

長白山其巔有潭周八十里南流至遼東朝鮮國  
爲鴨綠江南入於海北流爲女直混同江經金會  
寧府達五國頭城北東入海西夷黑水出漢張掖  
郡雞山今甘州南至燉煌今肅州過三危界梁雍  
二州之間程子以爲卽西珥河與漢志葉榆澤相  
貫漢武開滇爲今雲南其地古有黑水舊詞而知  
之但今水渟滯不入南海也中原之水惟黃河來  
最遠攷禹貢註及諸儒說黃河一自于闐國葱嶺  
一自西吐蕃之崑崙山發源合流二萬一千三百  
餘里東北與積石河合屬漢金城郡西南羗中而  
至龍門河渠志一統志皆云出今西番朶甘衛西

直四川馬湖蠻部正西三千餘里去雲南麗江西  
北一千五百里有水從地湧出泓方七八十里高  
瞰之若星列俗傳爲星宿海尋匪爲二大澤復豬  
曰哈刺海東出曰赤賓河合忽蘭也里朮二河東  
北流經崑崙山之南爲九度河水清騎可涉貫山  
中行西戎都會爲細黃河水流已濁繞崑崙山之  
南折而東流合乞里馬出河復繞崑崙之北自貴  
德西寧之境至積石經河州屬陝西合泚河東北流  
至蘭州始入中國又東北出沙漠經三受降城東  
勝諸州又折而東南入冀州今山西北境凡九千餘里乃  
元學士蒲察篤實所窮歷而得之大學衍義補亦

據此當以志爲定禹治水時河從積石東北而南計三千里至龍門爲西河冀州呂梁山石勢崇竦其流激震禹從呂梁山鑿龍門以殺水勢迺因其西流之性而導之又南而至華陰在陝之華陰縣自南而東至底柱在河南陝州之三门峡又東經孟津河南府孟津縣過洛汭河南府洛寧縣至于大伾大名府濬縣北過泲水真定冀州北枯降渠至于大陸邢趙深三州之地北分其勢播之爲九河復同聚一處爲逆河蓋迎之以入海千簡潔一水先儒誤分而二其一則河之經流也徒駭等河故道皆在河間滄州南皮東光慶雲獻縣山東平原海豐由寧津吳橋南皮諸處直達東海周定王五

年河徙矜礫始失故道漢文帝時決酸棗東清金

隄在河南延津榮陽諸縣至大名清豐一帶延亘千里武帝時溢平原屬德

徙頃丘今清豐縣又決濮陽瓠子口開州界注鉅野屬濟寧州

即大野通淮泗河始與淮通尚未入淮元帝時決館陶舊屬大名今屬

清河又決清河靈鳴犢口今高唐州舊屬清河郡成帝時決東

郡金隄決平原溢渤海清河高唐州一帶信都今冀州界唐

玄宗時決博州今東昌府溢魏州今大名冀州五代時決

鄆州今鄆城縣博之楊劉今東平之東阿縣楊劉鎮滑之魚池宋太

祖時決東平之竹村開封之陽武大名之靈河澶淵

太宗時決溫縣榮澤頃丘泛於澶濮曹濟諸州東

南流至彭城界即今徐州入于淮自此河入淮之始真宗時決

鄆及武定州尋溢滑澶濮曹鄆諸州邑浮於徐濟而東入淮仁宗時決開州館陶神宗時決冀州棗强大名州邑一合南清河以入淮一合北清河以入海南渡後河上流諸郡爲金所據金獨受河患其亡也始自開封北衛州決而入渦河南直隸壽甯亳蒙城懷遠之元時決衛輝之新鄉開封之陽武杞縣之蒲口榮澤之塔海莊歸德封丘諸界其臣建議疏塞若金會通河乃世祖所開以通漕運隨時救敝而已當時九河逆河故道久已淪入于海滄州接平州程子以爲正南山有名碣石者在海中去岸五百里今平原有馬頰河形存沙渠其跡尚可攷大



伍之北不行矣我

朝洪武中決陽武之黑陽山東經開封南至頓城潁州  
潁上東至壽州正陽鎮全入于淮故道復淤未樂  
中䟽濬稍引支流自金龍口入臨清會通河正統  
間又決滎陽天順間決祥符弘治間分流爲二一  
自祥符經歸德至徐邳入淮一自荊隆黃陵岡經  
曹濮達張秋鎮入海尋命重臣治築黃陵岡等口  
以塞張秋乃䟽爲二流一鑿蒙澤孫家渡至朱仙  
鎮經扶溝通許壽潁諸州邑合渦河至下鳳陽毫  
州達淮一䟽賈魯舊河由曹州出徐沛以通運河  
合淮俱入于海正德間決曹縣者再嘉靖間河歲

爲堯患屢遣重臣治未底績河流漫入於曹縣溢  
溢於魚臺出沛縣之飛雲橋南下徐邳十三年復  
塞由新開趙皮寨口盛流合渦河入淮故道今始  
復矣雍州之水自西近寨內玉門關至蘭州北東  
至華陰皆黃河繞帶又有弱渭涇汭漆沮澧諸水  
弱水出吐谷渾界窮石山自張掖郡刪丹縣西至  
合黎山與張掖河合餘波入于流沙涇出平涼府  
峽頭山經西安府邠州涇陽至馮翊陽陵縣今高陵縣  
入渭渭出渭源縣烏鼠山西北谷流入咸陽南至  
華陰入河汭出隴州弦蒲葦入涇漆出扶風古漆  
縣北經同官至耀州南合沮沮自坊州昇平縣北

子午嶺

延安府  
宜君縣

出富平縣合漆澧出扶風鄠縣終

南山亦東至咸陽俱合會同入於河冀州之水黃

河自陝西西北來經古蒲汾平之間又有汾衡漳

恒衛沁諸水蔡傳以汾出山西太原靜樂縣太岳

即霍山

至平陽府靈石縣東入河漳水二一出上黨

之沾縣大屯谷

太原府  
樂平縣

名爲清漳一出上黨之長

子縣發鳩山

屬潞安府  
改潞安府

名爲濁漳卽衡水

俱東北  
流至河

間阜城東  
光祿入海

恒水出真定之曲陽縣東入滹水至保

定之高陽縣入易水晁氏以西南流至真定行唐

縣東流入滋水南流入衡水衡出真定靈壽縣東

入滹沱河恒水在陝西者出吐谷渾界入臨洮因

名洮水入于黃河在真定者出衛輝府輝縣滏水  
出渾源州恒山南流入真定之定州至保定高陽  
合易水易出代州經保定之易州安州至高陽下  
與曹徐滋沙諸河合至雄縣南爲瓦濟河過直沽  
入海滋則出大同府之靈丘縣迴山經真保之行  
唐無極深澤諸縣東南流滹沱河出鴈門代州東  
流從真定至東鹿深州青縣合輝縣之衛河俱入  
海幽并州之水曰玉河出玉泉山經

大內出都城注大通河至白河與盧溝河合盧溝河出  
大同府桑乾山經太行山入今順天宛平縣界出  
盧溝橋東南至看丹口分兩流一至通州入白河

一經固安武清縣至直沽與衛河合分南北入海  
白河出密雲流入通州與盧溝河潞河合潞河自  
塞外丹花嶺分流合螺山鮑丘諸水爲東西二河  
俱合流入海沁水發太行山東北經輝縣合衛河  
入運又東南流下徐呂二洪合黃河入淮豫州之  
水黃河自山西蒲州平陸入境經河南之閿鄉靈  
寶陝渾池新安濟源孟津孟鞏溫汜水武涉河陰  
原武滎澤陽武中牟祥符尉氏陳留通許杞太康  
睢寧歸德諸州縣至南直隸鳳陽亳縣合馬腸河  
城西北合渦河其支流有四大槩交錯於祥符尉  
氏扶溝商水項城通許太康與南直隸壽州朱仙

鎮之間或溢兗州出沛或合渦河入淮又有伊洛

瀍澗滎波孟豬濟衛淮諸水伊出盧氏縣東南書

以出熊耳此山在盧氏之西南恐誤入於洛洛出陝西冢領山亦經

洛陽縣瀍出洛陽穀城山澗出澠池白石山經新

安縣皆會於洛合流至鞏縣入河濟卽沈水懷慶

府濟源縣王屋山二源分東西流歷虢公臺至溫

縣入河復出其南溢而爲滎卽滎澤東出于陶丘之

之北在館陶縣又東至于荷在今曹州地已涸東北會于汶卽

汶上縣又北東入于海波爲洛水別流孟豬在虞城

西北濟之別流衛出河南衛輝府輝縣從大名之

內黃濬縣出與滹沱淇漳諸水合臨清之會通河

北流至直沽淮出唐縣東南經桐栢山潛流三十  
里復東出經汝信東流會沂泗俱入海兗州之水  
其地最下今曹魚爲黃河下流又有濟漯樂雷夏  
雖沮汶泗淄濰濟出河南濟源漯出濟南之長山  
縣長白山西北流經章丘新城諸界樂出歷城縣  
入濟雷夏澤在濮州雷澤縣濰沮二水之別流自  
陳留浚儀陰溝至蒙爲濰東入于泗泗出兗之泗  
水縣陪尾山經曲阜至濟寧分流南入徐州北入  
會通河又出鉅野受沛水下流于睢卽沮水文有  
三源至泰安州靜封鎮合而爲一經寧陽平陰汶  
上又西至東平州注于濟經東阿濟寧入會通河

溜水出今青州萊蕪縣原山達臨淄東至壽光濰

水出瑯邪郡城今諸縣經高密昌邑濰縣東北俱入海

荊州之水其澤藪曰雲夢跨江南北八百里又有

江漢川九江沱潛江水發源於梁州西之岷山青

城諸山之陽出今茂州汶川縣東別爲沱經叙瀘

重夔入瞿峽過巫山出湖廣夷陵州荊州至于東

陵岳州府合洞庭過漢陽府合漢水至黃州江西

九江府合彭蠡鄱陽湖口經安慶池州太平應天諸府

儀真通州入海漢出陝西漢中蟠冢山之下始爲

氏道縣東源漾水東至武都爲漢過武東今武中

州爲滄浪之水過三澨卽郢州承天府今至于大別山漢



陽入江經黃州九江合鄱湖諸水同趨入海九江  
孔氏以爲潯陽非是沅辰漸元叙酉澧資湘九水  
是爲九江皆合于洞庭過巴陵合川水入武昌合  
漢水東南下入揚子江衡北岸甚急與江水俱入  
于海揚州之水北至于淮東南至于海東合江西  
江東諸水經豫章之南贛汀吉合衡永長沙別派入  
袁州出臨江會贛水入洪都合瑞洪所聚饒撫信  
浙之諸水于鄱陽今江西九江府蓋名其入口處  
與前江漢諸水同趨建康今南京蓋諸方水道所湊  
東南合蘇松常三郡水匯而爲震澤在吳縣南五十里又  
吐納常之宜興江陰鎮之金壇百瀆西來衆水而

下溢爲三江吳江界於吳松江震澤之間去吳松江七十里分東北流者爲婁江東南流者爲東江皆自常之靖江蘇之太倉東北入海北爲江北通泰至海門縣而入海所謂江漢朝宗者也禹時江淮未通賦汭于海至吳夫差與晉會盟黃池始開蘇之邗溝今爲運河自常之孟瀆鎮之京口以通于江江自揚之儀真亦開溝以通於淮隋因廣之今貢賦皆自江淮以達于

京師也二廣古百粵漢交州部廣西之水一曰濰江源出海陽山南流五里與永川湘水北分爲二故曰濰又名桂江合癸水至桂林城下合相思江入昭

潭今平樂府會平富樂荔臨賀諸水至梧州爲府  
江一曰左江又名藤江發源交趾至古邕州今思  
明府經容縣合容江經藤縣合繡江經南寧之合江  
鎮與右江合入橫州又名鬱江一名右江又曰黔  
江源出雲南廣南府之富州西洋江入廣西田州  
經象州今柳州合柳江至南寧府之合江鎮與左  
江合二江合入潯州大藤峽出爲潯江貴州古羅  
施鬼國其水曰盤江源出四川烏撒府普暢塞東  
經古夜郎地又爲黔中隸牂牁郡今普安州東北  
下流入安南衛經廣西泗城州入慶遠府烏泥江  
下合柳江卽爲右江以上三江分合爲二入梧州

大江卽漢武使馳義侯發夜郎兵下牂牁江是也  
西流經廣東封川德慶合肇慶之端溪江又名西  
江至番禺流入于南海廣東省之東南皆大海其  
水一出惠州博羅縣西流者爲東江一出江西大  
庾嶺卽梅嶺者爲浚水漢武時楊僕爲樓船將軍  
繫南越出豫章下浚水卽此至韶之英德爲浚陽  
峽一出湖廣郴州經武岡南入南雄之樂昌爲武  
水又南與浚水合而爲曲江過三水縣與西江合  
卽上漢謂牂牁江也皆合至於南海縣入于海雲  
南古西南夷焚鳩地其水曰浚池周五百餘里出  
潯江嵩明盤龍等江九十九泉源廣末狹若倒流

者故云滇漢武欲伐滇國於長安穿昆明池象滇以習水戰故亦以爲昆明誤也大理之葉榆河卽西洱海及瀾滄諸江其流不出本省惟廣南西洋江則由廣西經右江入于海其四海之水北海極遠不可窮東北至於朝鮮東至於登萊東南至於閩浙島夷日本琉球南至交廣瓊厓又南至於安南亡城真臘等夷國而西南至於交趾云

北直隸 北直隸古冀州地

京師卽金元舊都也衆山帶海有金湯之固真定以北至於永平關口不下百十而居庸紫荆山海喜峰古北黃花鎮險阨尤著故薊州保定重兵屯焉山

後諸州故我大寧都司地也自

國家棄以與虜則居庸之外所恃以爲藩籬者宣府耳廣平以南四方水陸畢會于臨清轉漕

京師輻輳而進若天津又海運通衢也河間真定保定之間多達兵營塢其人姓獷難馴且東安霸州武清而東野曠人稀姦宄伏匿頗基腹心之患迤山一帶則樵採耕牧之利居多姦人每竄其中有司病之蓋賦繁民困戶口流亡雖畿甸同風而順天之馬政河間之水潦患尤烈焉

國初安插降達於雲南廣福等處者迄今可以調用但以真保定居之似太逼矣

河南山東中都大寧四都司官軍輪聚

京師操練所以厚畿輔運國威也近歸權門常以兔班  
散哉

密雲直北白崖谷馮家谷外有兀良罕一部原係小王  
子北部因隙叛去至今相攻

潮河川寔爲虜衝沙淤水漫孤營難守九邊牆水口俱  
然可容無處乎

北畿防禦之勢山西行都司當其衝萬全都司護其背  
大寧都司藏其備薊州守備斷其徑萬全都司一  
衛一所嵌山西行都司之境瞭遠之道也大寧都  
司五衛一所嵌薊州守備之境夾持之法也

北京青龍水爲白河出密雲西南流至通州城白虎水爲  
玉河出玉泉山經

大內出都城注通惠河與白河合朱雀水爲盧溝河出  
大同桑乾山經太行入宛平界出盧溝橋至通州  
與白河合其玄武水爲濕餘高粱黃花鎮川榆河  
俱統

京師之北而東與白河合

都城東北古北口喜峰口潮河川相密邇直北黃花鎮  
白羊口去天壽陵九咫尺賴薊州重屯山後小醜  
漫突而宣府鎮且繞出其外可爲應

草橋關去保定府四十里屬高陽縣三义口社昔周世



宗顯德六年收復三關置重兵控扼燕薊以雄  
將爲瓦橋關霸州爲益津關高陽爲草橋關皆置  
重兵勢相依倚一處有警二關策應三關之固契  
丹不敢輕犯此五代之三關也今時則不然爾

永寧城四海冶龍門所一帶最單薄以朶顏爲藩籬而  
黃花鎮且無厚戍鎖鑰北門能免杞人祛篋之虞  
耶

居庸關經峽中三十里一夫可守虜但拆牆以進由關  
不能也

北京奉天殿兩壁斗拱間繪真武神像武當山致崇禮  
之極山繞數百里隸觀中

成祖起兵真武空中協助時

燕邸在北一念真靈皆山川密感故空中神

成祖之神也

京師堂扁北向蓋避尊也

紫荊山百鳥俱產獨無翡翠或他所移置山中輒飛去  
在京各衙門俸米出蘇常二州總約十萬餘石其白米  
乃儘派蘇州

通州新城錦衣千戶一員坐委子歲易四人門戶之防也

南直隸

南直隸古揚州地南京卽六朝舊都也

祖宗創業實基於此然江限南北古今特爲天險江北  
則徐頴二州地跨中原瓜連數省並稱雄鎮故淮

安特建兵府守以文武重職雖職司轉運亦示控  
扼之勢焉江南則安慶當長江委流西控全楚爲  
江表門戶沿海兵戍本以備倭而崇明常熟之民  
間作弗靖與江洋一帶出沒波濤肆行剽劫者不  
勝計故今江防海備其重一也若廬州則民習遊  
惰地不盡利鳳陽習俗本同加以高墻番守之冗  
費故皆易以告饑蘇松則田賦不均供億日困豐  
沛之間濁河泛濫幾淪魚鱉轉餉旣艱民亦凋瘵  
盖水患莫甚于斯者也徽州多山少田民逐末利  
風俗用偷池州在山麓江潯軍民統理不一寇盜  
因以竄匿鎮江則當京口之衝鑿山圍水海潮出

沒土田歲易處民勞甚矣

高皇帝於南都增都城於東南而建

宮闕面方山也

取四方山河山意

立太學於西北而營堂齋以雞

鳴也

取晨興勤苦意

陵寢在東因鍾阜也倉庾在西邇長

江也演武於內外教場無處而非警惕也祀功於  
上下山巖無時而忘勲勞也後臣當何如以保此  
志邪

留都十衛陳列江北浦子口五衛和陽龍虎應天  
橫海武德直當龍江下關處東西之中江淮衛設  
江浦縣濬陽右衛設和州以防上游英武衛設紅  
心驛飛雄衛設池河驛廣武衛設朱龍橋鳳陽縣

州之中以防北衝儀真之東鎮江之北有揚州重鎮不爲慮也

淮以北土無定畝以一望爲頃欺隱田糧律條未之能行也江以南戶無實丁以系產爲戶脫漏戶丁律條未之能守也

蘇松常鎮杭嘉湖東南財賦七府經界正而賦均惟湖爲最圩無定畝賦逐戶開常之弊久矣官田糧重蘇爲害不可勝言鎮殊鮮於六府迥不迨焉

蘇松常杭嘉湖多官田重額者自賈似道六郡公田令民佃租相沿不改之故蘇州官田糧特重

本朝抄沒沈萬三之遺也

應天太平寧國鎮江廣德五府州以興王之地全蠲賦  
不征近節議畝派勸米四升是時勢之宜也加勸  
之策與年爲更蓋有所必至者

淮以北麥食養人麥金屬金旺而生火旺而死故北方  
麥得氣之全自淮以南冬種春獲失其所爲性

洞多而勝惟常州府宜興縣長沙府安化縣

松江南臨海與寧波紹興正對清夜鷄犬之聲相聞

太湖介蘇常湖三府之中北納荆溪百瀆南納雲溪七

十二瀔荆溪百瀆止受金漂常廣諸水東埧旣立

宜徽應太之水皆出江雲溪七十二瀔港口日淤

苕川勢湊嘉興而湖州上塘運河直瀉吳江太湖

所入較古已減然水不能速退其何故歟三江旣  
入震澤底定自吳江長橋出合龐山湖以南入海  
爲松江自大姚分之過澱山湖以東入海爲東江  
自吳江縣鮎魚口北入蘇州運河經郡城之婁門  
東北入海爲婁江又有胥口白洋灣鮎魚口三支  
流惟吳江長橋築而交生沙壅松江之勢緩惟大  
石趙屯等浦淤而澱山水阻東江之勢緩惟七浦  
塩鐵等塘滯而陽城水阻婁江之勢緩近來三支  
流盛瀾白茅港北入於大江以達海而白茅港亦  
易淤淺

松江府東南遠環海近環黃浦西界三泖北阻吳淞江

水法亦疑矣

南畿徼地四設兵憲以備警於西九江府爲江西憲員  
於西北潁州爲河南憲員於東北徐州爲山東憲  
員於東南太倉爲浙江憲員四憲設援應有恃

揚州之田明溝洫築隄壩如湖州可歲取無量淮之鹽  
城亦然今頃畝一望而上湖水盈漫而下汪洋連  
海妄意上湖之水亦不難治所欲以時其蓄瀉是  
在瓜洲一帶置閘多許立表節以啓閉之何患其  
勢必漫隄也

江淮中河道惟寶應諸湖無夾塘卽湖隄東畔田爲之  
如高郵康濟河力甚易也



南都三十六倉悉驟挽自交約其值率銀半分致米一石倉九數區水遠若濬諸河其強半可省脚直三分之二

淮北多獸江南多禽湖廣多魚雲南多花廣西多樹川蜀多藥

揚子江蘆課銀幾九千兩應天居三之二太平和州次之鎮江又次之此

國初例也近漲沙所益統歸勢門清勘增稅爲宜

宣城梨國初歲貢五千餘斤後都北不輟貢例每靡巨費河間遷安梨味不減宣城近以言者已之然他如宣城梨尚多也

江淮濟川二衛軍專給舟卒之用

全廬之水匯於巢湖湖之港汊三百有六十其注之江則由無爲州黃落裕溪諸河是無爲爲全廬之牖戶也

太平府前瀦石曰固城丹陽巨浸後環大江天生橋旣開左右水亦稱前瀦之受宣徽廣德悉聚焉且采石爲江道一束便於登涉而金陵貼輔固要郡也徽州雖阻山成窰然亦南北衝道自池州石磧越武寧嶺至黟縣自寧國縣越叢山關至歙縣自太平縣越箬嶺至歙縣自昌化縣越昱嶺至歙縣自祁門休寧婺源可達江西又自婺源可達福建自歙縣

可達金衢

震澤注海三江松江一流已久爲淤上海之南澹浦口  
卽吳淞江嘉定之劉家港卽婁江常熟之白茅港  
乃震澤餘流向北注之揚子江者夫水勢順下最  
下爲南次東北乃今松江在南宜爲震澤正出  
之川反先被湮其盛流則歸白茅港水勢漸湊於  
北是長橋之所爲害其明驗也故近陽城昆承流  
壅復浚吳淞江南北兩岸安定諸浦間道北注劉  
家白茅二港又大黃浦流壅傍浚范家浜間道注  
澹口皆引水北流以順其勢而蘇松之占阻水利  
日盛千百年後又不知抵於誰止也

江南東海之防守在崇明吳淞江口而要在蘇州故崇  
明吳淞江設所而蘇州重鎮設三衛江北淮南海  
防守在泰州通州興化鹽城而要在揚州高郵淮  
安故泰州通州興化鹽城各設所而惟揚州高郵  
淮安設衛淮安當大瀆通海尤其要處故爲重鎮  
設二衛淮北海防患在東海守在海州而要在邳  
州故東海海州設所而邳州設衛

南京各衛所百戶印

成祖都北行取去三分之一迄今有官無印

揚子江盜類富民爲之其力可以坑陷邏者故每驅而  
不擒邏者自全之勢然也

太湖洞庭山無虎無蛇無雉

徐州不打春以其城似卧牛或云徐河善溢嘗鑄鐵牛鎮之故不敢傷牛

### 淮南重鎮

淮安南北要樞元淮南行樞密院同簽董搏霄嘗建議以爲南北要衝其地一失兩淮皆未易保守援淮安誠爲急務莫若於黃河上下瀕淮南之及自沐陽以抵沂莒諸州縣布連珠營每三十里設一總砦又於界中設一小砦使烽火相望而巡邏往來遇賊則併力疾戰無事則屯種而食然後進有援退有守常爲不可勝以待敵之可勝又言淮之南

北民壯者已進爲兵老幼無依者宜置軍民防禦  
司籍其民以屯故地練兵積谷且戰且守內金山  
東完固之邦外捍淮海出沒之寇而後皇圖可固  
也時不能用其言故淮安陷今按淮安東南遭運  
萃焉是乃秦隋成臯洛口也國計攸係治亂決之  
保護預圖當楮民撫兵以爲重鎮則南北有賴而  
有備無患矣董搏霄之言夫豈無取哉

劉季裴曰自古守淮莫難于謝玄又莫難于楊行密謝  
玄以八千人當符堅九十萬之衆清口之役楊行  
密以三萬人當朱全忠八州之師衆寡殊絕而卒  
以勝者扼淮以拒敵而不延敵以入淮也

## 山東

山東古青州地外引江淮內包遼海西面以臨中原師  
陸則悉會于德州自海道既廢遂以其西境爲餽  
運通衢南盡邳徐北沂天津歲有河患築塞挑濬  
之勞舟車牽挽之役所在不免而兗州水潦爲害  
則民之疾苦莫甚焉矧

京儲邊餉之外

王祿是供六郡徵輸於斯爲疲而青濟之間號多鑛  
賊禁戢尤難公私益交病之若遼陽自爲區域地  
本膏腴舊皆郡縣民用安土設衛以來生齒稍  
稀惟遷徙謫戍之人多歸焉雖漸規恢復可也登

萊本海運故道然勢險難圖稽之往蹟則平度州  
東南有南北新河蓋嘗治閘以達安東則避開洋  
之險宜亦有可講者

山東踞夫役歲約用銀七十餘萬兩

西三府百八十泉流爲汶泗洸沂四水泗洸沂注濟寧  
天井開汶水注南旺又堽城埧分汶水入洸河

泉獨多者大都爲其地高擁下流而河南土疎水勢所  
控遂成伏流至山東乃出如省中大明湖乃趵突  
泉所成源出玉皇山伏流至河南濟源縣湧出過  
黃河溢爲縈西北至黃山渴馬崖又伏流五十里  
出爲趵突泉有以糠驗之信然又如彰德府安陽



儒教洺水諸河皆伏流而出可見

青登萊三府隙地甚多皆可耕之所人事不脩溝澮不立一雨成漫而旱則赤地千里雖古河額俱堙置沃壤無所用誠可惜也元虞集之議至今可行

青州府礦徒特猛能以一當百天下礦氣特盛於青兗之間上礦九煎其最上全化爲銀五煎三煎乃其次下環產郡山中惡少盤據人莫能敵其無志於四方山淺路窮左海右曠無險可憑耳驅調則可爲用

青州城中實外陷惟女牆出上而城若平地蓋因地勢之舊非使之然也不患於攻

海豐盛畜牛偏鬻於遠

山東河南糧草徵與解不同各項俱招商收解逐年總部布政司一員于戶部會議舉行

### 山西

山西古冀州地背臨朔易表裏河山蓋有俯挹中州之勢焉析代以止虜數內侵故大同特設征鎮與延綏宣府互爲聲援鴈門偏頭寧武並置關戍雖烽火之警不殊而套賊爲急且保德河曲之間與虜僅隔一河稍或撤備則門庭皆勍敵矣若蔚州之鑛徒臨晉之屯卒潞城之逋民並以山谷阻深乘時抄暴要亦不足屯結也然邊餉旣廣

宗室彌蕃一切供輸自歲賦之外皆仰給河東之鹽  
課三晉之民勞瘁甚矣而邊卒方且叫呶待哺帥  
臣號令爲之不行此則積習流弊非漸圖之不可  
也

山西太原之北聯置鴈門偏頭寧武三關若醜虜內犯  
使左右夾攻腹背受敵又因河曲保德之間與套  
虜僅隔一河恐突入門庭堂室受害於太原平陽  
潞安三府汾代岢嵐應劄五州各置衛沁澤蒲保  
德平定諸州靜樂山陰馬邑諸縣各置守禦千戶  
所兵馬糧餉咸有所司又令三司並置太原諸道  
各置一路民兵復有所統規模可謂宏遠矣當其

時選用得人法令明勅無有匪才竊柄構禍於其  
間故中國之勢常如天日之尊而外夷罔不帖服  
也

黃河自古東勝州來歷大同界朔州之西入太原界河  
曲縣保德奇嵐州興臨寧鄉縣入平陽界石樓永  
和大寧縣吉州河津榮河縣至蒲州東折而流自  
興臨以南對西爲延安自保德河曲以北與套虜  
僅隔一河寧鄉石樓而下則已舒警矣

奇嵐州虜號乾城弘治十三年叅政王藻以該州山高  
土厚所資者惟嵐漪一河耳躬尋地脉鑿二井一  
在玄帝廟西一在觀音堂後又導東門外河入城

以益之又疏南門之隍潛通東河又于城西隅掘一池濬東入之渠渟滙其中歲久毀塌嘉靖二十九年兵備吳嶽命匠穿葺又鑿三井二在城隍廟東西一在按察司東并舊井共四眼每深二百二十尺皆以木板自底甃至上取其不壞也繼今而後者能淘浚之可以備不虞而無患矣

鴈門封山表郡從來舊矣十八隘自宋有之蓋宋失山後以此爲防今非昔比也而其慮殆有甚者不可慨哉又廣武當朔州馬邑大川之衝通忻代崞崞郡縣之路虜從大同左右衛而入勢當首犯東越廣武則北樓平刑皆爲虜衝西越白草溝則夾柳

樹鵬窠梁莫非要害鴈門警備于是爲急矣

寧武處三關之中當華夷之要衝爲東西之援應寔陽方溫嶺神池義井之門戶外接八角堡內維岢嵐以一守備一千戶居之自偏頭徂鴈門似落窠耳故設總兵府兵備道蓋左右策應居中變良有意也

寧武據兩關之中地勢平行虜易馳驅陽房口當雲朔馬邑之衝至爲要害雖距本關爲近而緩急常不得力近日築邊之議首及王野梁至老營堡蓋先慮也

偏頭西逼黃河與套虜僅隔一水蓋自渾脫飛渡以來

邊警不止然山濶崎嶇難于大舉老營東接平虜  
至大同邊不遠使東西聯絡築邊固塞且屯守  
則下角墩而南陽房口而東烏川是紛紛也舍門  
戶而理堂室誠有不得已焉耳

論曰西北爲天門東南爲地戶兩鎮三關之地從古重  
之然其爲形勢也千載所同而其爲便宜也則代  
代殊異何者燕昭破胡欲以陵趙武靈置郡

志謀

秦蓋自東圖西也逮季子主從張相破約則以韓  
魏爲趙蔽趙代爲燕蔽有自西臨東之感焉世宗  
北伐瓦橋爲崩重進濟師山後嚮應蓋自南圖北  
也逮良嗣失詞童貫否律則雲中下甲太原不支

燕山叛降河北割鎮有自北臨南之感焉又漢唐宅關中也雲中五原地大沙磧造陽踣促遂乃棄之其境蓋西遙而東隘金元之宅燕薊也盧龍遼水建號都邑灤曲龍岡大起宮闕其境蓋西隘而東遙我

朝御極勢亦屢更是故探根本之慮宜急東偏懲瘡痍之傷應先西徼今偏頭重鎮聯宣大以折衝寧鴈重門協居庸而固守則雖專力于東方未爲過也

三關邊城千里甲視碭縣蓋已盡地之利矣帶甲之士有原伍有常備有番上有召募有改撥有脩守民



兵蓋已盡人之力矣晁錯論中國之長技五皆不  
過劔弩戈戟之間今之火器可殺人破陣於數百  
步之外固漢所未有也蓋又盡人之能矣然而不  
可恃曰將不知兵兵不習戰而人心不知奮也故  
主兵不足恃益以客兵正兵不足恃益以民兵農  
夫百人不能養一戰士轉輸之靡費無極請發日  
相望於道是弊國也平民出力以供軍有警不免  
於自役戶口之蠹耗日滋而軍費之供需日廣及  
其聚也則不知所以爲用是瘠民也萬人冗食足  
以弊國瘠民而一人所得曾不足以贍其肌膚國  
受養軍之害下無養養之恩雖欲按軍法而行辟

未可也無寧簡衆而使之精厚緩而使之奮選將而任之乂重法而使之懲乎有一壯勇足敵老弱十卽有千軍可當一萬以二千軍之食食千軍猶愈於萬人坐食曾不及千夫之力也周世宗新立之初當敵勢方張之日就陣斬樊愛能何徽大簡諸軍驕將情卒一時改觀遂成混一彼能行於五季之末而況今日獨可處之無道哉然其本在於惠下其要在於選將故惠先而後威震威震而後法行威惠並流而後將材可致兵力可精兵精而後財用可節國勢可強民力可紓否則以將予敵以卒予敵雖險亦易雖衆亦寡不知其可也

套賊渡河而東焦家坪娘娘灘洋園子等處爲衝其要  
在偏頭關

陝西

陝西古雍州地山河四塞形勝甲天下然平涼固原  
一帶畜牧蕃滋外乏屏蔽胡騎漸已侵入鞏鳳之  
墟若延慶則原野蕭條兵亦精勁寧夏則跨有賀  
蘭山黃河之險虜難馳驟故爲備差易蓋本朝  
開拓以來受降故城又棄不守自移鎮榆林河套  
盡爲虜有烽火遂達於內郡矣甘涼以西左番右  
達而肅州九孤故土魯番輒肆侵犯以爲河西憂  
洮岷西寧則地入西羌實與四川同患苦且亦不

刺以殘孽竄居西海番人漸以南徙

國家既失茶馬之利而逋寇生齒日繁則西境腹心之禍也若漢中之襟喉巴蜀潼關之保障全陝並稱重地而險者在我矣然所在罄力以供邊奉宗室而平涼尤甚間閭愁苦又何加焉

榆林蔽延安花馬池蔽慶陽固原蔽平涼

西寧蔽河湟莊

浪蔽臨洮岷文蔽鞏昌靖虜蔽會寧沙州蔽甘肅

靈韋寧夏之接葭綏榆林之接蘭州河洮之接古

浪涼州之接環縣以援固原鎮番以援寧夏山丹

以援肅州張伯以援西寧此全雍邊防之大略也

漢中府洋縣有九兩雞生山谷間十數為群凡重九兩

漢中水俱南流連雲棧北口曰斜南口曰褒同爲一谷如洋縣瀘駱谷亦然兩山高峻水從谷道流出上設棧閣橋通行黑龍江即褒水

漢中踞褒斜谷爲經子午駱瀘諸谷次之諸閣爲緯仙人略陽七方等關達大散武林雞頭饒風駱谷等關達西安鳳翔

自涪陵由達州取西鄉踞入子午谷至長安統二口楊貴妃生荔枝馳道也

漢中府洋縣俗有解繳會孟春四日遊江上藤葛纏繳草木者解之云祛殃此尚鬼之甚也

陝中諸府水俱至朝邑縣入黃河渭水爲經而諸水附

達之臨洮府離隍北流至河州入黃河惟漢中府  
諸山谷水入漢江漢源嶓冢山在沔縣縣在府  
西徼東流悉歷諸縣直出金州故悉受諸水惟略  
陽縣在沔縣西北乃與漢江不預焉其鳳沔北背  
之水既不能越鳳翔鞏昌諸山入河又不能南入  
漢遂自大散關爲源控而西流經略陽入鞏昌兩  
當復折而南入保寧界廣元昭化劍州至保寧府  
城是爲嘉陵江

西安商州與襄陽上津縣止隔金州鵲嶺

鞏昌會寧縣百餘里溝澗鹹斥民窖雨雪爲飲

饒沃盛水草可耕可牧故名陸海又云塞北江南又云

百二山河蓋南北兩山脈會至龍氣極盛故冬不甚寒其堰埧渠陂排溉相濟有歌曰舉鍾爲雲決渠成雨注水一石其泥數斗且溉且糞長我禾黍惜其舍西安每地多遺利耳

漢中諸縣關棧散出惟鳳沔褒城最要四川保寧諸縣谷路散出惟巴與廣元最要

惟西安鳳翔二府深藏三窟自西北汧隴一窟沿邊城二窟外各鎮三窟三代前以王畿求中則居鳳翔秦漢後欲就四方則居西安

固原西北二百里海納都城控鳴沙州路東北三百里葫蘆峽城控韋靈州路

蔚州城如孟形不能攻

地網在秦州吳璘制以拒金因平為險

同州沙苑宜羊臥沙飲若繭耳筋脇味美甚

華嚴川一名樊川飲其水生癭長安縣南二十五里

襄東夔北入漢始界為金州險阻平曠之交也

### 河南

河南古豫州地閩閩中夏四方輳進蓋彰德則控河北

嵩洛以蔽山南南陽汝寧直走襄黃之郊而開封

則其都會也由開封以沂衛河可以漕山東沿汴

泗可以漕淮故言形勝者次關陝焉然分建

宗親班祿無藝以今計之歲賦幾至百萬民亦勞矣



且歸睢陳州一帶地魚數省統轄非一姦人常藉以首難剽捕則潰逸四出禍延他境彰德道出趙魏之間軍民左右屬盜雖斂跡而牽制之患實與歸德同若考七郡之地山水環互民物茂實則汝寧爲優鑄山獵野依憑險固強弓利弩出乎其間則河洛爲著然土地未闢教令未馴非課農宣化加意拊循則寇盜劫奪之禍歲不免矣

河南防河堤湖廣防江堤通泰海州海鹽縣等防海堤一決而魚其人弗加之意可乎土勢<sub>變</sub>人力訑訑今日云然

北方多蝎而無蜈蚣南方多蜈蚣而無蝎惟汝寧鳳陽

二物俱產此南北之交也

汴梁城內無螢火無蟬聲

汝寧產水稻如江南中都惟定遠霍山二縣有水稻普及  
諸縣穀價亦廉

彰德磁州滏源黑善陶境內有白土山其土可爲繪

### 四川

四川古梁州地劔閣表雲棧之固瞿塘鎖巴峽之流界  
以番簇阻以蠻部山水襟束自相藩籬故姦雄割  
據則盜兵不敢西窺地饒而險阨備也然姦宄內  
作懸車束馬勢不相及有難猝定者矣況上列  
親藩重兵外戍諸所供饋咸取給焉且松潘以孤城

介在番域而寄咽喉于龍州千里轉運輒爲番蠻所遮斯則巴西之隱禍也烏撒芒部諸夷雖犬牙形格仰我鼻息然內相黨結數啟兵釁且於叙瀘有唇齒之重要在因俗撫綏攜其私黨而已乃若碉門之臂視諸番播州之富藏四省殆與蜀相爲盛衰者焉建昌六衛僻處西徼自爲輿區民夷安業非所憂矣

四川天下絕險龍州松潘振其北播州諸夷列其南天全黎州當其西瞿塘守其東江山四塞關峽孤開可守一當百吐蕃西控烏思藏等處風俗樸魯慈教大行法令飭嚴行人所利非若北達烏合之衆

殘侵無紀況以重險臨之爲力又易南隣芒部東  
川烏蒙烏撒諸蠻徭要皆腹裏機上肉耳行都司  
六衛截制民夷可以安業而西之雅威茂灌南之  
崇慶瀘嘉馬叙北之疊溪綿漢彭石重重遶護深  
藏三窟所慮姦宄內作地饒充備不能施速定之  
術耳本朝

太祖從階文入城都取明昇蓋以計破之苟非儘兵東  
守瞿塘事未易成也

岷江自吐蕃來入松潘歷成都嘉定叙瀘重慶至瞿塘  
爲蜀江是岷江爲川中諸水之經其嘉陵江北自  
陝西來入保寧流至崇慶入岷江其黔江南自湖

廣來合施州江流注涪州入岷江其涪江西北自吐蕃來歷綿州潼川遂寧入嘉陵江其瀘江西北自岷山來流至合江縣入岷江其金沙江西南自雲南來入烏蒙府流至馬湖府與馬湖江合至叙州入岷江其大渡河西自吐蕃來入黎州流至嘉定州入岷江其平羗江西自雅州來流至嘉定州入岷江其界首河南自貴州來入永寧流至瀘州入岷江其白水江南自芒部來流至叙州入岷江其和水西自吐蕃來入天全六番流至雅州入平羗江大都川中水總一岷江其謂涪巴渝渠瀘嘉陵金沙蓋因諸水會流遂各以名之耳

川之形勢北有劔門不足恃而慮在松潘松潘以孤城  
介生蕃之域乃待食於龍州懸命千里之外設爲  
羗戎所截則疊溪以南如建瓴而下直抵茂州無  
難是誠限外隱弇耳西有黎州不足恃而慮在維  
州維州在保縣外無百里乃爲董卜韓胡所據是切近  
之災且復有自靈關一道可抵雅州自草坡一道  
可抵汶川縣自泄里壩一道可抵灌縣自清溪口  
一道可抵崇慶州其門庭顯禍乎

黎州安撫司爲巴蜀西門外有印嶺飛越清溪之險以  
臨吐蕃內復藏雅州之雕門始陽靈關以蔽腹重  
重重要隘出險據險唐韋臯城此以成征西之功

疊州生吐蕃介四川松蕃陝西洮州之中且東接陝西  
岷州其地山多層疊番虜出沒爲患不細洪武十  
五年指揮馬燁以三萬卒擒獲其酋失剌谷五千  
餘衆全師以歸要渠三面受敵勢不能應故取之  
甚易今復爲番族所有其地自後周置州歷隋唐  
宋元皆爲中國郡縣宜不可終棄但今林密道塞  
內犯少息可爲姑置者也

馬湖敘州二府逼臨蠻獠華與夷雜瀘州不雜夷實殷  
夷警成都以省藩重鎮控制西番而崇慶雅州亦  
難安堵重慶南接夜郎西通牂牁俗有夏邑蠻夷  
雜處

夏爲中夏人邑爲康居後  
蠻爲蠻獠後夷爲白虎種順慶間無外防保

寧夔州險據在我其地沃民殷諸府爲然當是海  
內樂土而馬湖敘州蓋略次之矣

川爲江源陝爲河源蹲據上游挈南北之輕重而川陝

自相依附古棧道係獨重爲川陝所通之路若舉

川之四境其入有數道一由峽江西陽陸道一由

雲南金沙江一由階文陰平道棧道其一耳

四川行都司六衛古越舊地有瘴過金沙江隆冬流汗

惟雨渡夜渡無害

天全六番無險而險在雅州故禁門紫石一關以雅州

所戍之

巴蜀地居極高而烏蒙特甚烏蒙南臨六詔東控諸蠻



故畢備諸種羅羅土獠蠻夷人悉聚焉

蜀中山水嘉定絕冠三峨山在焉

夔州二峽瞿塘峽巫峽歸峽山連七百里中貫一江而  
瞿塘尤爲三峽之門瞿塘獨在西又謂西陵峽灩  
澦堆當其口

### 湖廣

湖廣古荊州地襄鄧抗其頭顱蘄黃引其肘腋江陵制  
其腰腹伸膝南向亦足以雄視諸州矣若鄖陽之  
保商陝郴桂之跨閩粵辰流之押蔽雲貴六江中  
貫五溪外錯荆楚阨塞斯其備焉蓋二儀效靈  
獻秀故王氣獨鍾于

潛邸然襟江帶湖所至民罹水患寇盜亦復乘之過此則永州寶慶之間謹備苗夷而已矧

宗藩基布歲賦寔繁楚俗標輕鮮思積聚於是四方流民失業者多赴焉故其民率砮竄而難治谿洞諸蠻本以漢法羈縻差易馴擾惟永順保靖世席富强每爭奪獲罪輒假戰功自贖奸謀徧構驕橫滋萌

朝議不明猥加徵發使遠方之民坐困且久而玩敵將貽異日之憂謂宜定令毋輒輕發斯則善矣

施州洪武四年歸附置施州領建始一縣屬四川夔州府十四年置施州衛指揮使司屬湖廣都司二十

三年創建始縣隸夔省州入衛改施州衛軍民指揮使司屬湖廣布政司分隸守巡上荆南道領千戶所三軍民千戶所一宣撫司三安撫司八長官司三宣德三年五月開置搖把峒上愛茶峒下愛茶峒劔南四長官司鎮遠隆奉西坪東流蠟壁峒五蠻夷官司自衛至湖廣布政司水陸二千二百四十里

無襄陽則荊州不足以用武無漢中則巴蜀不能以存險無關中則河南不能以豫居無巴蜀則吳楚不能得以奠枕

沔湖廣八百六十里袤五百四十里爲江漢諸水所匯

緒於太白湖洩於沌口設河泊所三十六以課魚  
成化弘治來漢淤江溢湖水停注積滓所澄洲沙  
漸起佃民估客日集因攘爲業而墾耕之由是湖  
平強半矣今省所爲二十一水患日盛夏秋之交  
沱潛溢道車木堤排沙頭班家灣等處利害切要  
且繕工未至百年後沔更莫知誰何耳

省城南匯交廣滇貴諸水於洞庭而受之於前址引漢  
沔諸水而固之於後西承川蜀諸水折而過焉東  
有武昌縣樊山承之而爲大回釣臺橫之而爲小  
回水法滌洄天下莫如所嫌山氣不住故自古有  
不可居終之說大率楚廣俗邁而寡束泄而病成

其雜之以四方來者東南人以覓利至西北人以避地至寔能容之固其地氣耳

蘄黃北倚五關前憑大江占淮壩之上腴連雲夢之巨藪古豪傑有取焉然非宅中圖外之地其水要不如武昌其險要不如襄陽其路要不如荊州東漫瀘安則退無歸東中阻一江則江西不爲用肘腋之勝殊非所以成大此陳友諒所以得筭之少者也

永州寶慶正據五嶺之背氣局嶺南群山四固故廣西多瘴兩府嶺擁如案後曠諸湖故俱無瘴永州之背當衡嶽爲辰故雖無瘴於寶慶炎氣交盛若柳

州窪在一隅負之以衡求瘴之以九疑夾之以袁  
吉諸山欲其不爲瘴不可得矣

辰州當夷蠻咽喉西際施州南際靖州北際永順保靖  
諸溪峒五溪皆出焉能溪明溪西溪武溪辰溪惟  
東爲常德卽古武陵桃源之境五溪合而注之洞  
庭故洞庭者諸溪洞之庭除也

夏口在江夏縣之江北卽漢口漢水出江之口也大別  
山在焉又名南沔又名沔口沔水卽漢水漢沔雖  
二源其下流相合而入江故同爲一水沔水在潛  
江縣入漢其謂之口又水入江處來口喬口樊口  
塗口陸口沌口涓口皆此類吳魏相持以沔口爲

重鎮古皆稱漢口三國以後稱沔口

岳州府西境爲澧州慈利縣之地卽辰州府東北境界接九谿十八峒乃諸蠻出入門戶

國初數致警弗靖防戍誠不可玩今布立九谿等二衛四所及桑植安撫司領美坪十八峒

荆襄流逋專設撫民憲副以治之乃譏察奸細非招集之也其逋民本意避徭負賦長子老孫遂成家業緩恐生奸急則失所

海匱乃荊州北險築橫堤引水作三海綿亘數百里又爲八匱蓄泄水勢惜今盡占爲民田非爲失荊州之險其地十年六七澇亦苦於無所瀦瀉耳

潯陽一水而府名九江或謂烏蟬鳥白嘉靡畎源廩提  
筮似出附會或謂卽洞庭沅漸元辰叙酉豐資湘  
諸水名其所由來恐亦遠取不切意者其江西諸  
府九大流會於鄱陽而出湓口故取而名之不可  
知也

抽分在荊州以要川廣所出在蕪湖以要湓口饒河口  
所出在杭州以要錢塘江所下在淮安龍江關恐  
爲二稅在漳產在黃河所下恐爲漏稅  
武當石階山中有救窮草食三寸可代穀氣一曰冬夏  
不枯

五六月間長江水常入洞庭蓋岷峨雪消也



築塍爲田湖廣謂之沔湖州謂之埧福建謂之圳蘇州謂之圍

永順保靖酉陽土兵極猛可徵發凡用土兵所過地湏先淨路三十里以防狼子贖目

### 江西

江西古揚州地當吳楚閩粵之交險阻旣分形勢自弱安危輕重常視四方若保境和民則九江獨據上流牽制沿江州郡且密邇南康濱臨巨湖盜舟四出不可爲備南贛之間則汀漳雄韶諸山會焉連州跨境林谷茂密盜賊之興斯爲淵藪故設巡撫重職提師以臨之袁州地逼長沙逋民客戶頗難

譏察而南昌建昌饒州

宗室固在民疲供億視臨吉瑞信撫諸郡殆有加焉故凡江西之民樸質儉苦有憂勤之思弘治以來賦役漸繁土著之民少壯者多不務穡事出營四方至棄妻子不顧而禮俗日壞惡少間出矣

江西之水俱會鄱陽湖惟平鄉縣岐山水注湖廣醴陵縣下洞庭湖贛江介江西之中贛江源受章水東受貢水合於贛州府城北章江雖出大庾縣聶都山亦受湖廣桂陽猶溪水貢江則自福建汀州發源其建昌之水壺溪源福建泰章廣信之永豐溪源福建建寧戈陽之信議港源福建郡武饒

州之鄱江德興大溪樂安江俱源徼婺安仁之雲  
錦溪源福建邵武南昌之鶴源水源湖廣九宮山  
亦各會於鄱陽而五老峰峙於西二鍾石門峙於  
東大孤又塞其口此江西山水之結勁直塞閉而  
疏暢周折者也

九江安慶之間江岸南北兩山對峙如門江流至此一  
束是謂海門第一關此江西水口成化間水衝北  
岸小孤山之址平陸成淵小孤獨立江中風氣稍  
瀉矣

贛州龍南界惠州興寧徼瘴徼癩惠之長樂龍川興寧  
俱界贛林深山燠寒少暑多其俗悉巾縞純素爲

群豈有所爲以鎮之耶

浮梁景德鎮善陶甲天下其土取諸樂平近故樂平亦

病窪

萍鄉縣羅霄山下有石潭歲旱以長木投之輒雨雨止

木浮起

浙江

浙江古揚州地崇山巨浸所在限隔然嘉湖與江淮相  
表裏嚴衢以徽饒爲郭郭左信郡右閩關大海東  
蟠繞出淮揚之境斯固四通八達之區也安吉長  
興以西本山越巢窟界在廣德之間上無兼轄之  
司訟訐繁興頗號難治嘉湖寧紹四郡則震澤東

海之所經也。朔衛於壘，大遺三農之害，而鹽徒之患次之。處州之民多依山盜鑛，動至數千，持之則激，緩復馳。縱慶元松溪一帶歲被侵暴，溫台並海而南，信宿達于福寧。估客良便之，然不能不防他寇也。若倭夷奉琛入貢，則風帆直指寧波，突至倭來，黠詐叵測，先事而備，其在定海乎？

湖絲絕海內，歸安爲最。次德清，其次嘉興之桐鄉、崇德、杭州、類汴人種，族自南渡時至者，故多汴音。鳳山門尤逼真，宋宮殿在也。

金衢徽諸水入江，至嚴州當一峽口。諸山水齊發峽口。

不能卽去故嚴州每罹水患至有五天餘

杭州惠州婦人爲市恒代川已婦人撐幹門戶

陳同甫園視杭州喟然嘆曰可灌上書宋孝宗言非駐  
驛之地杭之西湖高據上流故也

紹興府山會蕭三縣地高兩頭通江處各設壩控海畔  
通瀉水勢有陡門舊甚窄近移置陡門於三江口  
總十八座三縣永無水患內復增成田額二萬許  
紹興城越勾踐所築堅緻不易攻

浙西之水北自大江南至錢唐江凡入海處古五十有  
一今止存者十有七

詩豎居山嶼中而大江繞外故瀦爲七十二湖今淤者

半之

鈔關臨清河西務蒔墅九江淮安揚杭州金沙洲內惟河西務杭州金沙洲稅貨餘止稅船料河西務入京門戶杭州出閩廣總道金沙洲出雲貴總道雲貴貨簡故金沙洲近無部差臨清稅貨亦稅船莫知云何也

天目山面杭背宣寧國縣冷渡山東南有千秋嶺者爲入杭間道

海鹽海塘連年葺治之費雖天關了义等處激衝勢烈要亦人事未至攬胥利於創工董吏便於自逸乃故踈其謀工無求建良可惜也石塘在外所以防

通志卷之二  
潮勢土塘在內所以固滲隙二者皆不可無其間  
土塘受患病於石塘先隳石塘之隳病於土築椿  
淺又病於灶夫引潮以便抱甕所以不久成害卽  
如漕河砌間土民利行舟停滯欲便經營之利私  
賂工師作爲衝械

### 福建

福建古閩越地以溫處衢信爲北藩建昌南贛爲右壁  
惠潮爲外戶海爲門封壤促甚而重關內阻溪山  
秀美民用以和然處人輒用盜鑛流入政和壽寧  
之境大爲患害古田福寧一帶本竊魚鹽之利山  
谷邃深逋寇每憑之而嘯聚但不常出也濱海上



下外過倭寇之流逆通琉球之貢不為要害而海  
物互市妖孽符興則漳浦龍溪之民居多且汀漳  
之山尤廣人跡罕到獨與贛州聲勢相通提督兵  
備實交治之而來春安溪沙尤之間則屬之捕盜  
官矣蓋簡僻莫如郡武器訟莫如漳州土沃民稀  
耕稼自給兵燹不加則八郡一也

氣熱興漳泉特甚地勢卑為山嵐鬱掩故然

閩中有流民率居三津舊為一祖所分不  
入編戶凡流產棄地居之耕獵以自食不供  
賦役推警疏足各統於首長酋長名為老人  
具中網長服諸府游處不常

汀州及江西諸府產杉出淦口徽產杉出蛙河口

福州城外海洲名河口居十九姓交往琉球國諸  
其語性

福建僻阻海濱危關簇嶺於浙江江西廣東俱盤陟而出諸水悉注省下建延邵汀爲上四府據上流福興泉漳爲下四府瀕海設都司十一衛於下所以防海設行都司五衛一所於上所以防關海重於備倭琉球次之而我民盜海者漳則爲甚關大則崇安之分水關建寧之仙霞關次則光澤之杉關分水由江西上饒以越建寧仙霞由浙江江山以越建寧杉關由建昌以越邵武

漳之龍溪縣海沙月港者夷貨畢集人煙數萬

海上舟師猛敢者福建漳泉龍溪縣沿海月港地方及廣東東莞縣南頭千戶所歸德福永地方

東南多木犀謂其花氣所蒸成瘡莫知其然否福建木犀盈山瘡者多山人浙江好植此花且以和茶食之蘇州有木犀山連岡一望而患瘡無算俯察之道固不可忘此也

海舟入夷貨布絲鍋磁爲多

海舟宜加警風迅之期歲凡仲春東南風始迅番舶乃北行入夏風尤迅海人水舶趕風日可行數百里

### 廣東

廣東古百粵地蓋五嶺之外號爲樂土由雄連可以向荆吳由惠潮可以制閩越由高廉可以控交桂而形勝亦寓焉濱海一帶島夷之國數十雖時時出

沒要其志在貿易非盜邊也然諸郡之民恃山海之利四體不動惟務剽掠有力則私通番船無事則挺身爲盜桴鼓之警彌滿山谷凡以良民困於徵求通山之禁久弛教之不修而大征數舉之過也且密邇蒼梧征蠻幕府在焉軍旅之興殆無寧歲兵糧供饋咸以待乏沈地產珠池番物駢集本民用所興而內使數來采辦民反病之故外負富饒之名而內實貧困者廣東是也

瓊州府古珠崖郡居浮海中週貳千餘里中有黎母山絕峻五峯諸蠻盤藏號黎人最中者爲生黎不與州交其外爲熟黎雜耕州地黎人原姓黎後多姓

王及符熟黎舊俱黎產今半爲湖廣福建奸民亡  
命又南恩藤梧高化征夫利其土占居爲各稱峒  
酋或供賦役或賦而不役成化來副使涂棐有犁  
庭之計漸就編差弘治末復之而符南蛇之亂連  
郡震驚其小醜漫突亦無時息警故上策莫善於  
拔其根株或編甲食土責限繹來或遷置高雷羸  
畝湖廣曠區而圖籍之

廉州人作閩語福寧人作四明語海上相距不遠風氣  
相關耳

瓊州東畔水道文昌之舖前清瀾會同之調懶樂會之  
博教萬州之蓮塘南山之李村崖之臨川諸港不

可舶舟其西畔水道澄邁之東水臨高之博浦僭  
之洋浦昌化之烏泥感恩之抱羅崖之保平諸港  
有灣汊俱可泊舟

廉州無賦入京至不能自給官俸取給瓊州者歲以萬  
計雷州無京解正德後并免廉解廣西絕無京解  
軍餉取贍廣東及福建海北之引鹽湖廣之行糧  
南贛衡永之鹽稅

俗有阿公錢卽社意月朔各出錢貯以待患賙之人謂  
廟地生錢

海潮應月浙江廣福等處潮俱有信獨瓊州潮半月東  
流半月西流其大小應長短星不隨月

雷州突出海南前屏瓊臺故倍炎又謂極地得伏雷蓋陽盛所結非雷也

雷州雜黎人黎習黎語能用夏以變之亦易

高州據山高處邊海諸郡爲偏高地阜溪通炎氣不盛比之雷廉肇瘴瀉稍解

肇慶有草名胡蔓又名羊角鈕食之斷腸

高廉等處多毒蛇蜈蚣被傷者服香白芷五靈脂雄黃末藍澱汁傳之蜈蚣入喉小豬兒斷喉取血或鷄血飲之再飲生油一口卽吐出蛇入口并七孔子割猪母尾瀝血口孔中卽出卒爲蛇繞不解用熟湯淋之或人尿治之

惠州鷄籠山頂有龍潭歲旱鉄釘投之輒雨  
兩廣雇募打手自嘉靖初始

國初行梁集法後改設衛所正統間復起民壯似有  
梁集遺意亦郡縣自安之圖固分軍民二矣乃復  
於棘門動顧烏覩夫素練云哉

惠潮祭則云契契石契木契湖

南海上群寇華夷且集襲珠池摘商貨則採海爲生  
甚猛悍濱海處緩急可召募爲用

### 廣西

廣西古百粵地當嶺南右偏三江襟帶提封甚廣然內  
給藩封外困邊圉而風氣習又視廣東特異



如府江綿亘八百里則已半爲苗夷所有阻兵江  
道肆爲寇竊不但古田荔浦數縣苦其蠶食而已  
潯州則大藤峽跨在黔鬱二江之間諸蠻巢穴在  
焉剽剽四出急則投竄雖有上隆州五屯所扼其  
咽喉不足制也若興安西延六峒與武岡州陽峒  
接壤徃實據之是爲桂林北境之患柳慶以西則  
八寨號爲盜區洛容懷遠並罹慘毒而賓州其襟  
喉矣然右江一帶惟岑氏最强思田旣已殘破則  
泗城州猶嬰樊之虎計非削弱不可也且南寧控  
遏兩江坐躡交趾桂筦保障或者其在是乎

雲南廣西在處土官割據蠻洞彼此讐殺貽患地方

朝廷每下撫巡司府官員撫諭動經數歲不得停帖是雖夷性酷拗亦撫之者多貪利之人以養成之如雲南木邦孟養廣西思恩近日之事其酋明云司府官不過一狗乞與一大骨頭便去矣今日縉紳遇骨於地不狴然而爭者幾人悲夫

廣西麗江自交趾廣源出分憑祥龍州至南寧合左江思明之水則自上思州起注龍州入交趾界是爲明江

廣西五屯千戶所居荔浦斷藤峽府江藤縣中當峽右臂及白石寨十二磯濠江口之衝爲諸徭要道其間山泉佳秀獸木豐麗巖石奇俊田沙衍沃足以

裕其居而過其害洪武間立所近復增置城堡集  
獐兵以守之借其力以爲用亦一隅雄鎮也

廣西徭獐蠻雜生蕃類然微各有別徭多姓黎氏初  
靜江之興安義寧古田融州之融水懷遠有之猜  
忌輕生烙蹠善奔能忍饑獐初慶遠南丹之人呼  
爲獐今桂之荔浦修仁永福且多而忻城荔波天  
河永順永定尤厲其慶遠思恩分生熟二種蓋以  
入編籍爲熟也獐無酋長板籍惟推勇者爲郎火  
餘自稱火蠻有撫水蠻出慶遠酋多蒙姓有西原  
蠻出廣容之南邕桂之西酋多甯始有廣原蠻出  
邕州西南今羈縻州峒多古蠻地

上思州舊爲思明府土官屬語服悉夷弘治間改入流  
隸南寧近漸被聲明之化其習相遠之驗乎

慶遠戍不懈止足以控牂牁昆明十五部地耳本部獍  
人漸據編氓產無能禁也郡境文明之化徒以爲  
自安惜耶

潯州瘴氣殊盛惟東平南縣近梧州者稍舒可

府江卽灘江發源興平縣海陽山經桂林平樂至梧州  
左江源廣源州右江源我利州經太平南寧之合  
江鎮二江合是爲鬱江又黔江源牂牁界經柳州  
象州至潯州與鬱江合是爲潯江至梧州與府江  
合東注封川縣德慶州肇慶府至番禺縣入海三

江爲經其餘諸水各附焉是梧州乃兩廣輻輳八  
桂門戶水陸要衝民夷總節開設三堂於此自成  
化元年始其兩廣設鎮守總兵永樂年始總制都  
御史景泰三年始

府江長八百里自梧達桂中度灘瀧三百六十至平樂

稍平橫亘巔下襟喉八桂必由之地乃兩岸

猺獞

集剽掠去城不數里輒禦人而魚肉之雖堡寨沿  
江爲毒不息其無雄衆長志以藩省節鎮夾於梧  
桂兩端而兵備署嶽平樂耳三府惟全州爲樂土  
柳州猺獞與黎平相通接

左江土兵弱不可用可調者惟右江思恩田州泗城南

丹爲最也

右江土官喜於見調調土兵人給米一升廣西米斗銀三分餘每人月該銀一錢俱爲土官所得土兵自齎糧以往且獻名倍役者之數以規糧給

左右二江之中設奉議馴象南丹三衛以斷其連奉議君貴縣爲潯州西徼馴象居橫州爲南寧東徼南丹居賓州爲柳州南徼

遷江五屯二所直隸廣西都司欲其無援易於馭也田州岑猛得盧蘇王受爲左右手蘇善謀狡詐百出勇不如受受身矮多聞技無戰不克陽明平田州受尋死蘇劫鎮安毋容邦彥今走住歸德

廣西及高唐等府山嵐瘴氣成瘴如坐甑中頃時  
來潮雨用時雨疊更春謂青草瘴夏謂黃梅瘴夏  
秋之交謂新木瘴中秋謂黃茅瘴霜降後乃可無  
恙大抵炎方陰氣塞固陽多發淺草木水泉皆稟  
惡氣人元氣不固卽感而成疾是謂瘴瘧治者不  
宜發表麻黃金沸散青龍白虎湯不可用只宜溫  
中正氣亦或投以薑附沈存中七棗湯用烏頭七  
移七泡亦此意平時調攝宜平胃散正氣散及節  
食寡慾戒多七情保無虞也

蠱毒有數種蛇毒蜥蜴毒蜈蚣毒草毒食之變亂元氣  
心腹絞痛或吐逆不定面目青黃十指俱黑驗蠱

法吐於水沉而不浮含黑豆豆脹爛脫皮嚼之不  
腥嚼白礬味甘皆是治蟲法飲白水牛血立效王  
氏傳濟方歸魂散必用方雄硃丸皆可

斷藤峽舊名大藤峽韓都御史雍平賊後改斷藤舊藤  
絕流蔓生韓爲斷之周六百餘里下口在潯州府  
西北境上口接柳州府武昌縣勒馬峽兩崖壁立  
叢樾蔽天中流奔匯狺狺峭聚行者患之近設有  
上隆州以控上口五屯所以控下口風氣天成巢  
突猶昨其庶乎陳都御史金處行旌魚鹽瓦器以  
給之數年盜息易求通峽然猶有所未盡故亦不  
能守於其終必摘其酋而受之職以居之稅商以



克慶廩或可爲永久之圖處興安六峒八寨亦此意

程番民中縞惠州亦然

征蠻法全剿不如殲戮明捕不如暗執征戎法避銳不避歸殺衆不殺降

衆建諸侯而小其力乃處土夷良法土官自相讐殺只爭地爭襲辨疆域明譜系二事不可緩也

廣右風甚冲雅有修然物外之意蓋得地脉正南但逼海陰不當陽不免病在遺淡六祖出其地踰海占城南賓童龍國隸占城風亦相類佛書謂王舍城卽此地云目連舍基尚存今羅漢中有賓頭盧尊

卽童龍轉音

征南法須夏調秋催霜降進山冬至後散旅臘月招懷  
殘姓次年春纔易處耕

雲南

雲南古梁州 裔境地崇岡嶺激澗縈紆城郭人民  
居十七時恬則蜂屯蟻聚有事則獸駭禽奔蓋人  
自爲險勢難統一者也必知其領要則雲南臨安  
大理永昌鶴慶楚雄頗號沃壤然安路納交趾金  
騰地擁諸甸瀾滄聯絡寧麗曲靖壓烏蠻王公  
設險於斯要矣而土酋大者元江武定景東麗江  
小者姚安比勝鄧州霑益並以兵力稱桀向背靡常

三三竟 羅長江境垣之則不之三三三三三  
尋甸一帶風土絕異兵衛新疎故諸羅標營相尋  
而本邦孟蠻亦恃其險遠至今不聞悔禍谷在撫  
綏失策本無置制可言然滇南北向中州必假道  
貴陽而後進稍值兵梗坐令隔絕則滇池之達焉  
湖武定之達建昌川陸具存久而榛塞在今日所  
宜亟講而萬里埃宦類難得人則夷情蠢動未爲  
無故此尤不可不慎也

嚴洞天下洞天之首

所轄夷民大率僰羅二種僰人與漢人雜居充役公府  
羅羅性疑深居一寨人得詒害之

通川貴商道東路白水平夷亦資孔一帶如分水嶺炒  
鐵溝龍井舖小哨兒等處西路南寧松林炎方霑  
益州一帶如老雅林桐車壩石灰窰梭羅灣等處  
夷羅不時出沒劫掠商貨又貴州倚蘭寨等處賊  
徒互相勾引官立勢難禁捕各驅本地夷守護之  
稱其既廩費出於商而官爲取發焉兩全之道也  
舊曾有議顧興辦不時并官費口糧及令夷自索  
商保路錢皆未便宜耳

貿易用貝貝俗謂貳以一爲庄四庄爲手四手爲苗五  
苗爲索索蓋八十貝也

廣南順寧諸府俗好食蟲

元江麗江蒙化景東等府師宗彌勒新化寶山巨  
津和曲祿勸蘭順等州元謀等縣役無定紀故科  
無定數惟大理太和十年一役其鄧州賓州騰越  
北勝趙姚浪穹永平五年一役雲南縣三年一役  
自餘州縣一年一役差有規差耳

諸省惟雲南諸夷雜聚之地布列各府其爲中華人惟  
各衛所戍夫耳百夷種曰焚人蠻人各有二種卽  
黑羅羅白羅羅麼些禿老步門蒲人和泥蠻土僚  
羅舞羅落撒摩都摩察儂人沙人山後人哀牢人  
哦昌蠻懈蠻魁羅蠻傳尋蠻色目潯河尋丁蠻栗  
步

雲南領十四府八軍民府五州惟雲南臨安大理鶴慶  
楚雄五府嵌居中腹地頗饒沃餘俱瘠壤警區大  
抵雲南一省夷居十之六七百蠻雜處土酋割據  
但黔寧遺法沐氏世守比之廣西貴州省土官不  
同差有定志而西有濶滄衛聯屬永寧麗江以控  
吐蕃南有金蔭騰衝以持諸甸東有元江臨安以  
扼交趾北有曲靖以臨烏蠻各先得其所處惟尋  
甸武定防戍稍疎本邦孟密性習叵測不江景東  
土酋稱桀老撾車里姻好安南阿迷羅台瘴癘微  
梗廣南富州界臨左江不可不加之意也

雲南自貴州烏撒衛入曲靖霑益州爲通衢烏撒衛實

居四川烏撒府之地又自貴州普安州入曲靖又有廣南府一路出廣西安隆上林泗城今英國禁不由又有武定一路從金沙江出四川建昌衛今亦莽塞

南徼緬甸木邦老撾車里八百干崖隴州孟銀孟定諸處俱文外事

大理府江山襟帶隘險阻民物清麗自古有取都焉城東有西洱海卽葉榆河周三百餘里中有三島四洲九曲之勝城西有點蒼山高千餘丈盤亘三百餘里聳十九峯蒼翠如玉

干崖甸地熱四時蠶絲亦可用

二大水俱源吐蕃一金沙江自西北來經麗江鶴慶武  
定東北出四川馬湖一瀾滄江自西北來經麗江  
大理蒙化臨安車里東南入海地勢中仰然也其  
滇池西洱海撫仙湖瀘沽河石城河魯窟海子俱  
周廣三五百里山脉局厄然也

木邦一帶諸甸賤女

雲貴交廣俗尚銅鼓集事

鎮遠苗俗有爭以銀布請行頭媒講其講舉筭以爲紀  
講殺人曰笑頭講盜牛馬曰犯尾

阿迷州有大井煙來水出投以竹木則焚

滇產從番而出若鑿武定山通金沙江可出也



六詔乃西南夷雲南全省之地夷語謂王爲詔其都在

大理麗江蒙化三府及四川行都司建昌等衛而  
居大理九义六詔俱姓蒙氏凡名嗣代各項父名  
下一字蒙舍詔在蒙化府浪穹詔在大理府浪穹  
縣鄧賧詔在大理府鄧川州施浪詔在浪穹縣麼  
些詔在麗江府蒙雋詔在建昌衛六詔惟蒙舍居  
南蒙舍至皮羅閣始强盛滅五詔盡有其地遂總  
名南詔遷居太和城卽大理府子閣羅鳳用段儉  
魏爲相獲唐西瀘令鄭回而尊之至其孫異牟尋  
創立法制脩議禮樂設三公九爽三託諸府之官  
以分其任回復勸尋歸唐是開南詔聲名文物者

鄭段之力居多蒙氏歷年二百五十而鄭氏趙氏迭興皆不乂至石晉天福間段氏始立元世祖得南詔降段爲總管迄我

朝尚爲鎮撫不絕

### 貴州

貴州古西南夷羅施鬼國地地蠻夷並同滇境而山箐峭深地瘠寡利夷性猾詐殆有甚焉故泗州恣其狼吞伺竊外戶則守在永寧芒部盤據廣土蹲伏北藩則憂先畢節若思南石阡銅仁數郡界在鎮筓西播夷洞之間鳴張永突貽患寔深况地離東川烏蒙諸部師旅繹騷每與川湖同其災害而

軍民歲計又六半仰給於二省兵荒交值時有弗繼之憂且水西普安凱里諸酋富甲他夷地連肘腋逞姦首禍患豈一朝故知梟獍之資不忘格鬪而爭彊奪職乃其兵端焉然夷虜自相翦伐貴在因俗以特撫定不足煩

國家力也

鬼方極遠之國卽莫靡之屬也鬼之爲言遠也按貴州有羅鬼夷俗又呼貴州爲鬼州

貴州省乃川楚滇桂之衝大路三自鎮遠偏橋興隆清平平越新添龍里至省而威清平坝普定安莊安南爲中路自省而威清平坝安順鎮寧永寧州普

安爲西路自省而割佐龍場谷里水西奢香金鷄  
閣鴉歸化畢節周泥黑章瓦甸烏撒爲北路小分  
路自省南五十里爲程番自平越而南六十里爲  
都勻自鎮遠而東北爲思州爲銅仁自鎮遠而北  
爲石阡爲思南自鎮遠而西北爲黃平自畢節而  
赤水普市爲永寧衛由普安西亦資孔驛達雲南  
曲靖平夷衛由烏撒西倘塘驛達雲南曲靖益  
州由程番南達廣西泗城州由都勻南獨山豐寧  
達廣西南丹州由思州東達湖廣沅州由思南東  
達四川酉陽西達四川播州北達四川涪州由黃  
平達四川草塘白泥容山由永寧衛北達四川瀘

州由永寧州南達廣西泗城州由省北底寨養龍達四川播州其各小路不能悉載

貴州區制之槩永寧控泗城而倚在普安畢節播州而倚在烏撒上下八衛開普道而自相爲倚五開烏撒守門戶而五開接鎮遠烏撒援普安

黎平門戶全貴鎮遠都會水陸貴州省城統括諸衛

貴州地特高故水四出盤江源出烏撒合扼長江烏泥江注泗城州長河冉溪江一源出都勻注南丹烏江源出程番合南明河繞省城復合清水陸廣等河至思南注涪州界首河源出谷郎山合赤水等河由永寧衛注瀘州可渡河源出一普安烏撒繞注曲

靖悍柯江源出八番注泗城大岩江源出諸苗合  
福祿江彩江注柳州新化江源出諸苗合八丹江  
清水江注辰州鎮陽江河處洞河重安江注沅州  
貴州有養龍坑在省城北二百餘里當春和特繁馬其  
間雲霧晦冥類有物蜿蜒與馬交其產必龍駒

貴州軍餉仰給於四川湖廣各十有八萬餘  
各布政司田土惟貴州無頃畝冊應辦糧差各於土官

名下總行認納

貴州偏橋清浪銅鼓五開四衛及黎平中潮龍里新化  
亮寨新化屯五所俱隸湖廣據上游也雲南潯益  
所隸貴州開行道也四川黃平所隸貴州厚夷防

也河南汝寧所隸中都守鳳陽也河南磁州所隸山西重壺關也山西廣昌所隸萬全嚴紫荆也山西平定所隸後軍謹外應也浙江嘉興所隸蘇州運海防也潼關衛隸中軍係親戍也山西蒲州所隸潼關衛援關戍也

四夷今之四夷北虜爲急國初設大寧都司屯重兵鎮之其地統出山後而遼東宣府大同勢相連屬自偏頭關逾河跨西北大虜之警守在東勝河套之南又有榆林實爲六鎮後棄大寧移置都司於保定而宣府遼東勢始分矣正統以來有司又失守東勝大虜乃得逾河而偏頭關迤西遂有河套之

虞因循既久有司又不肯以時巡套東勝之鎮併近內地形勢愈弱於是所賴以衛

京師防邊虜者不過遼東宣府大同榆林四鎮而已夫四鎮所領各堡亦有精壯苟足其糧餉守備等官勤加巡哨爲之牽連援救自足以各守地方督率耕牧從古備邊之道也今則撫臣假調操以自固將帥假按伏以爲奸地方屢失糧餉屢乏實此之故矣若哈密之失守土魯番之拒命則由近日文臣貪功置制失宜失中國之信不足爲慮大虜自套來者則亦不刺一種竄于陝之西海地方蔓延至於西寧使一帶地土不得耕種土民不得安業



直抵洮岷頗難制禦則其勢有可慮者今惟有  
革調操按伏之弊堅壁固守勤加巡哨爲耕牧長  
計而無徂近利乃可爲也其治南蠻之道則在率  
土著良民得以自相守望一或不支爲之連屬附  
近地方策應之如湖廣之永靖廣西之狼兵置之  
不復徵調民足相死兵不毒民無貪功之文臣無  
貪利之武將亦不數年而晏然矣

右以上論調操按伏乃今日之弊耳臣又聞兵無定形  
古人云五指之更彈不如合拳之一扶故擇要害  
之地選良將統精兵數萬賊來分散搶掠聚者不  
過數千我常以數萬逐數千其筭不爲不是但今

邊將多不知兵所爲俱被賊誘而復之故將不得人不可言調操也

又聞兵忌形露賊來不知我之虛實必攻墩誘我我不往應但分兵按伏於屯堡或依山林或阻溝澗乍隱乍見使賊見我堡屯處處有兵而不露多少之形攻墩又不往應自生疑懼矣及賊散入屯堡又被我伏兵擒斬彼敢復深入乎今或一聞賊來攻墩卽發兵擡營往救賊反得以設伏誘我縱我不爲所誘彼常以精卒數千絆我於外卽堡寨之內盡爲蹂踐矣若使我兵不受其絆於外彼敢無忌憚若是乎故將不得人亦不可以言按伏矣

又聞近之善守邊者每十餘墩必總委一官提調十墩之中擇一可守者先儲米數石水數缸賊近邊卽歛十墩之軍共處一墩每墩止留善走者一人舉煙放砲又潛來共墩而處賊若攻墩不分有軍無軍墩分俱寂然無聲彼攻空墩常多半日之勞而卒無所得攻有人之墩則輒被木石擊傷而墜相繼來者見我各墩煙火齊舉卽莫測孰爲有守而自畏矣所謂以靜制動以佚待勞常形人不形於人者此類是也然此法須先遠探挨賊往之處我乃提兵間道而往伏於要害誘而取之乃爲得策今皆不揣敵情不分奇正一槩鳴鼓遽出兵未集

而形已露魯何益乎故將不得入九調操按伏反  
爲邊防弊政故不得不痛革者況帝王之道以全  
取勝此固在所不講者也

曾三異因話錄地螺或用子午正針或用子午丙壬間  
縫針天地南北之正當用子午或謂今江南地偏  
難用子午之正故以丙壬參之古者測日景於洛  
陽以其天地之中然有於其外縣陽城之地小偏  
則難正用亦自有理

黃支國合海日南之南三萬里類瓊俗民且富庶  
于閩國統十三州周四千里氣序和暢宜五谷其俗知  
禮在葱嶺山北葱嶺高千里西域三十六國惟一

嶺爲限

占城成化末爲交趾所逼航海來訴爲分之

香貨以占城賓達儂所產爲上三佛齊所不如大食國  
寶貨多甚特遠難至或假三佛轉市之

北胡韃靼俗拜日月初生凡舉事以月盈虧爲進止其  
坐西北

吐蕃謂王爲贊普香語以疆雄爲贊以丈夫爲普其誇  
強雄於王則其所務可知矣是夷習先以蔽其識  
豈真不可以爲善耶

四夷惟朝鮮禮俗雖箕子遺風固亦東方之氣耳

撒馬兒罕去肅州西九千里漢屬賓國地衍土腴類我

關中且產諸色玉誠外夷樂土元附馬帖木兒主  
其國洪武中入貢其孫迄今不絕

暹羅國在占城南原暹與羅斛二國暹國土瘠人貧仰  
給於羅斛至正間暹始降於羅斛合爲一國

回回曆出天方國國在西域國西有默德那國皆沃壤  
樂俗相似江淮風土回回曆甚精密佛家等子聲  
音之樂亦出其國聞善醫藥惜未得其術

占城國逼交趾之南風俗遠不侔國有神助故氏寡奸  
慝民詐未白今過鰐魚潭魚出食之理直者魚避  
去有厄于魚虎者作符咒魚虎自投死廣州發洋  
八日至其國

南海番國惟三佛齊差大商舶聚焉故三佛齊所售多有他國產者

北虜食醒甑夜目不明睡則沉熟可乘故被虜者每竊馬以逃但爲頭墩哨夫殺以報功

烏蒙俗人年十四五擊左右齒乃娶

朵顏近數請增貢又結好俺達不豫爲圖是肘腋之癰也

北虜生生之資仰給畜牧績毛飲漣以爲衣食各安土風徂習勞事不見紛華異物而遷故家給人足戎備完整歷代以來雄者便能虎視四方金太祖元世祖是也中國風俗之敝季運之際奢侈無度財

通鑑目錄卷之一  
用損耗人情偷惰民窮盜起遂至兵事不振吁可  
畏哉

通鑑目錄卷之一